

欽定明史

卷一百十六之二百二十四

欽定明史

卷一百一十五

明史卷二百十六

列傳第一百四

總裁官總理事務經筵講官少保兼太子太保保和殿大學士兼管吏部戶部尚書事加六級張廷玉等奉

敕修

吳山

陸樹聲子彥章

瞿景淳子汝稷

田一鵠沈懋學懋學從孫壽民

黃鳳翔韓世能

余繼登

馮琦從祖惟訥從父子咸

王圖劉日寧翁正春

劉應秋子同升

唐文獻楊道實陶望齡李騰芳

蔡毅中

公弼

羅喻義

姚希孟

許士柔

顧錫疇

吳山字曰靜高安人嘉靖十四年進士及第授編修累官禮部左侍郎三十五年改吏部尋代王用賓爲禮部尚書明年加太子太保山與嚴嵩鄉里嵩子世蕃介大學士李本飲山欲與爲婚姻山不可世蕃不悅而罷帝欲用山內閣嵩密阻之府丞朱隆禧者考察罷官獻方術得加禮部侍郎及卒請卹山執不與裕景二邸並建國本未定三十九年冬帝忽諭禮部具景王之藩儀嵩知帝激於郭希顏疏欲覘人心諷山留王山曰中外望此久矣立具儀以奏王竟之藩司禮監黃錦竊語山曰公他日得爲編氓幸矣王之藩非帝意也明年二月朔日當食微陰麻官言曰食不見卽同不食嵩以爲天眷趣部急上賀侍郎袁

煒亦爲言山仰首曰日方虧將誰欺耶仍掇護如常儀帝大怒山引罪帝謂山守禮無罪而責禮科對狀給事中李東華等震懼劾山請與同罪帝乃責山賣直沽名停東華俸書罪在部臣帝乃責東華等命姑識山罪吏科梁夢龍等見帝怒山甚又惡專劾山乃并吏部尙書吳鵬劾之詔鵬致仕山冠帶閒住時皆惜山而深快鵬之去穆宗卽位召爲南京禮部尙書堅辭不赴卒贈少保諡文端

陸樹聲字與吉松江華亭人初冒林姓及貴乃復家世業農樹聲少力田暇卽讀書舉嘉靖二十年會試第一選庶吉士授編修三十一年請急歸遭父喪久之起南京司業未幾復請告去起左諭德掌南京翰林院尋召還春坊不赴久之起太常卿掌南京祭酒事嚴敕學規著條教十二以勵諸生召爲吏部右侍郎引病不拜隆慶中再起故官不就神宗嗣位卽家拜禮部尙書初樹聲屢辭朝命中外高其風節遇要職必首舉樹聲唯恐其不至張居正當國以得樹聲爲重用後進禮先謁之樹聲相對穆然意若不甚接者居正失望去一日以公事詣政府見席稍偏熟視不就坐居正趣爲正席其介如此北部要增歲幣兵部將許之樹聲力爭歲終陳四方災異請帝循舊章省奏牘慎賞賚防壅蔽納讜言崇儉德攬魁柄別忠邪詔皆嘉納萬厯改元中官不樂樹聲屢宣詣會極門受旨且頻趣之比趨至則曹司常事耳樹聲知其意連疏乞休居正語其弟樹德曰朝廷行相平泉矣平泉者樹聲別號也樹聲聞之曰一史官去國二

十年豈復希揆席耶且虛拘何益其冬請愈力乃命乘傳歸辭朝陳時政十事語多切中報聞而已居正就邸舍與別問誰可代者舉萬士和林燦比出國門士大夫傾城追送皆謝不見樹聲端介恬雅備然物表難進易退通籍六十餘年居官未及一紀與徐階同里高拱則同年生兩人相繼柄國皆辭疾不出爲居正所推卒不附也已給廩隸如制加太子少保再遺存問弟樹德自有傳子彥章萬曆十七年進士樹聲誠毋就館選隨以行人終養詔給月俸異數也樹聲年九十七卒贈太子太保諡文定彥章有節槩官至南京刑部侍郎

瞿景淳字師道常熟人八歲能屬文久困諸生間教授里中自給嘉靖二十三年舉會試第一殿試第二授編修鄭王厚烷以言事廢徙鳳陽景淳奉敕封其子載堦爲世子攝國事世子內懼盡重幣景淳却之時恭順侯吳繼爵爲正使已授幣慚景淳亦謝不納旣而語景淳曰上遣使密詔狀微公吾幾中法滿九載遷侍讀請急歸江南久苦倭總督胡宗憲師未捷景淳還京謁大學士嚴嵩嵩語之曰倭旦夕且平胡總督才足辦南中人短之何也景淳正色曰相公適度之耳景淳自南來目覩倭患胡君坐擁十萬師南中人不得一安枕臥相公不欲聞誰爲言者嵩愕然謝之歷侍讀學士掌院事改太常卿領南京祭酒事就遷吏部右侍郎隆慶元年召爲禮部左侍郎用總校永樂大典勞兼翰林院學士支二品俸侍經筵修

嘉靖實錄疾作累疏乞骸骨歸踰年卒贈禮部尙書諡文懿爲編修時典制誥錦衣陸炳先後四妻欲封最後者屬景濬撰詞不可介嚴嵩爲請亦不應橐金以投卒笑謝之子汝稷汝說汝稷字元立好學工屬文以廕補官三遷刑部主事扶溝知縣扶宗人神宗令予重比汝稷曰是微服至邑庭官自扶扶溝民耳讞上竟得釋歷黃州知府徙邵武再守辰州永順土司彭元錦助其弟保靖土司象坤與酉陽冉御龍相讎殺汝稷馳檄元錦解兵去三土司皆安尋遷長蘆鹽運使以太僕少卿致仕尋卒汝說字星卿五歲而孤構文成輒跪薦父木主前萬厯中舉進士官至湖廣提學僉事亦以剛正聞子式耜別有傳

田一儒字德萬大田人隆慶二年會試第一選庶吉士授編修進侍講萬厯五年吳中行攻張居正奪情起用賢等繼之居正怒不測一儒偕侍講趙志皋修撰沈懋學等疏救格不入乃會王錫爵等詣居正陳大義一儒詞尤峻居正心喟之未幾志皋等皆逐一儒先請告歸獲免居正歿起故官屢遷禮部左侍郎掌翰林院辭疾歸未行卒一儒視身嚴苦家無贏資贈禮部尙書懋學字君典宣城人父寵字畏思嘉靖中舉鄉試授行唐知縣以民不諳織紉置機杼教之調獲鹿徵授御史官至廣西參議師貢安國歐陽德又從主畿錢德洪游知府羅汝芳創講會御史耿定向聘寵與梅守德共主其席懋學少有才名舉萬厯五年進士第一授修撰居正子嗣修其同年生也疏既格不入乃三貽書勸嗣修諫嗣修不能用以工部

尙書李幼滋與居正善復貽書爲言幼滋報曰若所言宋人腐語趙氏所以不競也張公不奔喪與揖讓
征誅並得聖賢中道豈儒安足知之幼滋初講學盜虛名至是縉紳不與焉懋學遂引疾歸居數年卒福
王時追謚文節從孫壽民字眉生爲諸生有聲崇禎九年行保舉法巡撫張國維以壽民應詔甫入都疏
劾兵部尙書楊嗣昌奪情復攻總督熊文燦言嗣昌挾軍旅權付文燦兵十二萬餉二百八十餘萬使賊
面縛輿櫬猶應宣布皇威而後待以不死今乃講盟結約若與國然天下有授柄於賊而能制賊者乎通
政張紹先寢不上壽民以書責紹先乃請上裁嗣昌皇恐待罪帝以疏違式命勿進壽民遂驪括兩疏上
之留中少詹事黃道周歎曰此何等事在朝者不言而草野言之吾輩媿死矣後道周及何楷等相繼抗
疏要自壽民發之壽民名動天下未幾移疾去講學姑山從游者數百人福王時阮大鍼用事銜壽民劾
嗣昌疏有大鍼妄陳條畫鼓煽豐芑語必欲殺之壽民乃變姓名避之金華山國變乃歸不復出

黃鳳翔字鳴周晉江人隆慶二年進士及第授編修教習內書堂輯前史宦官行事可爲鑒戒者令誦習
之世宗實錄成進修撰萬厯五年張居正奪情杖諸諫者鳳翔不平誦言於朝編纂章奏盡載諸諫疏及
居正二子會試示意鳳翔峻却之當主南畿試以王篆欲私其子復謝不往屢遷南京國子祭酒省母歸
起補北監時方較刻十三經註疏鳳翔言頃陛下去貞觀政要進講禮經甚善陛下讀曾子論孝曰敬父

母遺體則當思珍護聖躬誦學記言學然後知不足則當思緝熙聖學察月令篇以四時敷政法天行健則可見聖治之當勤勵繹世子篇陳保傅之教齒學之儀則可見皇儲之當早建豫教疏入報聞尋擢禮部右侍郎洮河告警抗疏言多事之秋陛下宜屏游宴親政事以實圖安攘爲今大計惟用人理財二端宋臣有言平居無極言敢諫之臣則臨難無敵愾致命之士鄒元標直聲勁節銓司特擬召用其他建言遷謫如潘士藻孫如法亦擬量移而疏皆中寢士氣日摧言路日塞平居祇懷祿養交臨難孰肯捐軀爲國家盡力哉昔宋藝祖欲積懃二百萬易遼人首太宗移內藏上供物爲用兵養士之資今戶部歲進二十萬初非舊額積成常供陛下富有四海奈何自營私蓄竊見都城寺觀丹碧熒煌梵刹之供奉齋醮之祈禳何一不糜內帑與其要福於冥漠之鬼神孰若廣施於子遺之赤子帝不能用廷臣爭建儲久未得命帝諭閣臣以明春舉行大學士王家屏出語禮部鳳翔與尙書子慎行左侍郎李長春以冊立儀上帝怒俱奪俸意復變鳳翔又疏爭不報遂請告去二十年禮部左侍郎韓世能去張一桂未任而卒復起鳳翔代之尋改吏部拜南京禮部尙書以養親歸再起故官力以親老辭久之母卒遂不出卒於家天啟初諡文簡世能字存良洲人鳳翔同年進士由庶吉士授編修與修世宗穆宗實錄充經筵日講官歷侍讀祭酒禮部侍郎教習庶吉士館閣文字是科爲最盛世能嘗使朝鮮贈遺一無所受

余繼登字世用交河人萬曆五年進士改庶吉士授檢討與修會典成進修撰直講經筵尋進右中允充日講官時講筵久輟侍臣無所納忠繼登與同官馮琦共進通鑑講義傳以時政缺失歷少詹事兼侍讀學士充正史副總裁已擢詹事掌翰林院兩宮災偕諸講官引洪範五行傳切諫不報進禮部右侍郎二十六年以左侍郎攝部事陝西山西地震南都雷火西靈鐘自鳴紹興地湧血繼登於歲終類奏因請罷一切誅求開採之害民者時不能用雷擊太廟樹復請帝躬郊祀廟享冊立元子停礦稅撤中使帝優詔報聞而已旋擢本部尙書時將討播州楊應龍繼登請罷四川礦稅以佐兵食復上言頃者星隲失度水旱爲沴太白晝見天不和也鑿山開礦裂地求砂致狄道山崩地震地不和也閭閻窮困更加誅求帑藏空虛復責珠寶奸民蟻聚中使騶張中外壅隔上下不交人不和也戾氣凝而不散怨毒結而成形陵谷變遷高卑易位是爲陰乘陽邪干正下叛上之象臣子不能感動君父言愈數愈厭故天以非常之變警悟陛下尙可恬然不爲意乎帝不省繼登自署部事請元子冊立冠婚疏累上以不得請鬱鬱成疾每言及輒流涕曰大禮不舉吾禮官死不瞑目病滿三月連章乞休不許請停俸亦不許竟卒於官贈太子少保諡文恪繼登樸直慎密寡言笑當大事言議侃侃居家廉約學士曾朝節嘗過其里蓬蒿滿徑及病革視之擁粗布衾羊羣覆足而已幼子應諸生試夫人請爲一言終不可

馮琦字用韞臨朐人幼穎敏絕人年十九舉萬厯五年進士改庶吉士授編修預修會典成進侍講充日講官歷庶子三王並封議起移書王錫爵力爭之進少詹事掌翰林院事遷禮部右侍郎改吏部洎政勤敏力抑營競尙書李戴倚重之二十七年九月太白太陰同見於午又狄道山崩平地湧大小山五琦草疏偕尙書戴上言近見太陰經天太白晝見已爲極異至山陷成谷地湧成山則自開闢以來惟唐垂拱中有之而今再見也竊惟上天無私惟民是聽欲承天意當順民心比來天下賦額視二十年前十增其四而民戶殷足者則十減其五東征西討肅然苦兵自曠稅使出而民間之苦更甚加以水旱蝗災流離載道畿輔近地盜賊公行此非細故也諸中使銜命而出所隨奸徒動以千百陛下欲通商而彼專困商陛下欲愛民而彼專害民蓋近日神奸有二其一工伺上意具有成奏假武弁上之其一務剝小民畫有成謀假中官行之運機如鬼蠅取財盡錙銖遠近同嗟貧富交困貧者家無儲蓄惟恃經營但奪其數錢之利已絕其一日之生至於富民更蒙毒害或陷以漏稅竊曠或誣之販鹽盜木布成詭計聲勢赫然及其得財寂然無事小民累足屏息無地得容利歸羣奸怨萃朝亡夫以刺骨之窮抱傷心之痛一呼則易動一動則難安今日猶承平民已洶洶脫有風塵之警天下誰可保信者夫嗔拜誅闕白死此皆募民丁以爲兵用民財以爲餉若一方窮民倡亂而四面應之於何徵兵於何取餉哉陛下試遣忠實親信之

人采訪都城內外閭巷歌謠令一一聞奏則民之怨苦居然可觀天心仁愛明示咎徵誠欲陛下翻然改悟坐弭禍亂乃禮部修省之章未蒙批答而奸民搜括之奏又見允行如納何其賢妄說令徧解天下無礙官銀夫四方錢穀皆有定額無礙云者意蓋指經費羨餘近者征調頻仍正額猶逋何從得羨此令一下趣督嚴急必將分公帑以充獻經費罔措還派民間此事之必不可者也又如仇世亨奏徐鼎掘墳一事以理而論烏有一墓藏黃金巨萬者借使有之亦當下撫按覈勘先正其盜墓之罪而後沒墓中之藏未有罪狀未明而先沒入貲財者也片紙朝入嚴命夕傳縱抱深冤誰敢辨理不但破此諸族又將延禍多人但有株連立見敗滅輦轂之下尙須三覆萬里之外止據單詞遂令狡猾之流操生殺之柄此風一倡孰不效尤已同告緡之令又開告密之端臣等方欲陳訴而奸人之奏又得旨矣五日之內搜取天下公私金銀已二百萬奸内生奸例外創例臣等前猶望其日減今更患其日增不至民困財殫激大亂不止伏望陛下穆然達覽亟與廷臣共圖修弭無令海內赤子結怨熙朝千秋青史貽譏聖德不報尋轉左侍郎拜禮部尙書帝將冊立東宮詔下期迫中官掌司設監者以供費不給爲詞琦曰今日禮爲重不可與爭其弟戶部主事璵適輦餉銀四萬出都琦立追還給費事乃克濟三十年帝有疾諭停礦稅旣而悔之琦與同列合疏爭且請躬郊廟祭享御殿受朝不納湖廣稅監陳奉以虐民撤還會陝西黃河竭琦言

遼東高淮山東陳增廣東李鳳陝西梁永雲南楊榮肆虐不減於奉並乞徵還皆不報南京守備中官邢隆請別給關防徵稅琦不可乃以御前牙關防給之時士大夫多崇釋氏教士子作文每竊其緒言鄙棄傳註前尙書余繼登奏請約禁然習尙如故琦乃復極陳其弊帝爲下詔戒厲琦明習典故學有根柢數陳讜論中外想望丰采帝亦深眷倚內閣缺人帝已簡用朱國祚及琦而沈一貫密揭言二人年未及艾盍少需之先用老成者乃改命沈鯉朱廣琦素善病至是篤十六疏乞休不允卒於官年僅四十六遺疏請厲明作發章奏補缺官推誠接下收拾人心語極懇摯帝悼惜之贈太子少保天啟初謚文敏自琦曾祖裕以下累世皆進士裕字伯順以戌籍生於遼東師事賀欽有學行終雲南副使祖惟重行人父子履河南參政從祖惟健舉人惟訥字汝言江西左布政使加光祿卿致仕惟重惟健惟訥皆有文名惟訥最著惟健子子咸字受甫少孤事母孝母疾不解衣者踰年母歿哀毀骨立萬厯元年舉於鄉再會試不第遂不復赴講求濂洛之學嘗曰爲學須剛與恒不剛則墮不恆則退治家宗顏氏家訓鍾羽正稱子咸信道忘仕則漆鵬子循經蹈古則高子羔云

王國宇則之耀州人萬厯十一年進士改庶吉士授檢討以右中允掌南京翰林院事召充東宮講官妖書事起沈一貫欲有所羅織圖其教習門生也盡言規之累遷詹事充日講官教習庶吉士進吏部右侍

郎學翰林院兄國方巡撫保定廷臣附東林及李三才者往往推轂圖兄弟會孫丕揚起掌吏部孫瓚以
尙書督倉場皆陝西人諸不悅圖者目爲秦黨而是時郭正域劉曰寧及圖並有相望正域逐去曰寧卒
時論益歸圖葉向高獨相久圖旦夕且入閣忌者益衆適將京察惡東林及李三才王元翰者設詞惑丕
揚令發單咨是非將陰爲鉤黨計圖急言於丕揚止之羣小大恨初圖典庚戌會試分校官湯賓尹欲私
韓敬與知貢舉吳道南盛氣相詬訾比出闈道南欲劾賓尹以圖沮而止王紹徽者圖同郡人賓尹門生
也極譽賓尹於圖而言道南黨欲傾賓尹并及圖宜善爲計圖正色卻之紹徽怫然去時賓尹已爲祭酒
其先歷翰林京察當圖注考思先發傾之乃與紹徽計令御史金明時劾圖子寶坻知縣淑抃贓私鉅萬
且謂國素疾李三才圖爲求解國怒詈之圖遂欲以拾遺去國圖兄弟抗章力辯忌者復僞爲淑抃抃劾圖
疏播之邸抄圖上疏言狀帝爲下詔購捕乃已及考察卒注賓尹不謹褫其官明時亦被黜由是其黨大
譟秦聚奎朱一桂鄭繼芳徐兆魁高節王萬祚曾陳易輩連章力攻圖圖亦連章求去出郊待命溫詔屢
慰留堅臥不起九閱月始予告歸國亦乞休去未幾卒四十五年京察當事者多賓尹紹徽黨以拾遺落
圖職天啟三年召起故官進禮部尙書協理詹事府明年魏忠賢黨劉弘先劾圖遂削籍尋卒崇禎初贈
太子太保諡文肅淑抃終戶部郎中劉曰寧字幼安南昌人萬曆十七年進士改庶吉士授編修進右中

允直皇長子講幃時冊立未舉外議紛紜曰寧旁慰曲喻依於仁孝光宗心識之曠使四出曰寧發憤上疏陳六疑四患極言稅監李道王朝諸不法狀疏入留中以母病歸起右諭德掌南京翰林院就遷國子祭酒奉母歸吏進贏金數千曰例也曰寧峻卻之尋起少詹事母喪不赴服闋召爲禮部右侍郎協理詹事府道卒贈禮部尙書天啟初追諡文簡

翁正春字兆震侯官人萬厯中爲龍溪教諭二十年擢進士第一授修撰累遷少詹事三十八年九月拜禮部左侍郎代吳道南署部事十一月日有食之正春極言闕失不報明年秋萬壽節正春獻八箴曰清君心遵祖制振國紀信臣僚寶賢才謹財用恤民命重邊防帝不省吉王翊鸞請封支子常源爲郡王正春言翊鸞之封在宗藩要例已定之後其支庶宜止本爵乃授鎮國將軍王貴妃薨久不卜葬正春以爲言命偕中官往擇地得吉中官難以煩費正春勃然曰貴妃誕育元良他日國母也奈何以天下儉乎奏上報可代王欲廢長子鼎涓立次子鼎莎朝議持二十餘年正春集衆議上疏鼎涓卒得立琉球中山王遣使入貢正春言中山已入於倭今使臣多倭人貢物多倭器絕之便否亦宜詔福建撫臣量留土物毋俾入朝帝是之四十年進士鄒之麟分校鄉試私舉子童學賢爲御史馬孟禎等所發正春議黜學賢謫之麟而不及主考官給事中趙興邦元詩教因劾正春徇私正春求去不許頃之言官發湯賓尹韓敬科

場事正春坐散不謹敬黨大恨詩教復効正春正春疏辯益求去帝雖慰留然自是不安其位尋改吏部
掌詹事府以侍養歸天啟元年起禮部尚書協理詹事府事抗論忤魏忠賢被旨譴責明年御史趙蔭昌
希指効之正春再疏乞歸帝以正春嘗爲皇祖講官特加太子少保賜敕馳傳異數也時正春年逾七十
母百歲率子孫奉觴上壽鄉閭豔之未幾卒崇禎初諡文簡正春風度峻整終日無狎語倦不傾倚暑不
裸程目無流視見者肅然明一代科目職官冠廷對者二人曹鼐以典史正春以教諭云

劉應秋字士和吉水人萬曆十一年進士及第授編修遷南京司業十八年冬疏論首輔申時行言陛下
召對輔臣諮以邊事時行不能抒誠謀國專事蒙蔽賊大舉入犯既掠洮岷直迫臨鞏覆軍殺將頻至喪
敗而時行猶曰掠番曰聲言入寇豈洮河以內盡皆番地乎輔臣者天子所與託腹心者也輔臣先蒙蔽
何責庶寮故近日敵情有按臣疏而督撫不以聞者有督撫聞而樞臣不以奏者彼習見執政大臣喜聞
捷而惡言敗故內外相蒙恬不爲怪欺蔽之端自輔臣始夫士風高下關乎氣運說者謂嘉靖至今士風
三變一變於嚴嵩之黷賄而士化爲貪再變於張居正之專擅而士競於險至於今外逃貪黷之名而頑
夫債帥多出門下陽避專擅之迹而芒刃斧斤倒持手中威福之權潛移其向愛憎之的明示之趨欲天
下無靡不可得也語并侵次輔王錫爵時事蔡時鼎南京御史張守誠亦疏論時行並留中應秋尋召

爲中允充日講官歷右庶子祭酒二十六年有撰憂危竑議者御史趙之翰以指大學士張位并及應秋所司言應秋非位黨宜留帝命調外應秋遂辭疾歸初御史黃卷索珠商徐性善賊不盡應上章籍沒之應秋嘗卷啟天子好利之端男子諸龍光奏許李如松至荷枷大暑中應秋言一妄人上書何必置死地時詞臣率優游養望應秋獨好譏評時事以此取忌竟被黜歸數年卒崇禎時贈禮部侍郎諡文節子同升字晉卿師同里鄒元標崇禎十年殿試第一莊烈帝問年幾何對曰五十有一帝曰若尙如少年勉之授翰林修撰楊嗣昌奪情入閣何楷林蘭友黃道周言之俱獲罪同升抗疏言曰者策試諸臣簡用嗣昌良以中外交訌冀得一效拯我蒼生聖明用心亦甚苦矣都人籍籍謂嗣昌縲紲在身且入閣非金革比臣以嗣昌必且哀痛惻怛上告君父辭免綸扉乃循例再疏遽入辦事夫人有所不忍而後能及其所忍有所不爲而後可以有爲臣以嗣昌所忍覘其所爲知嗣昌心失智短必不能爲國建功何也成天下之事在乎志勝天下之任在乎氣志敗氣餒而能任天下事必無是理伎倆已窮苟且富貴兼樞部以重綸扉之權借綸扉爲解樞部之漸和議自專票擬由己與方一藻高起潛輩扶同罔功掩敗爲勝歲糜金縉養患邊圉立心如此獨不畏堯舜在上乎曩自陛下切責議和而嗣昌不可以爲臣今一旦忽易墨縲而嗣昌不可以爲子若附和黨比緘口全軀嗣昌得罪名教臣亦得罪名教矣疏入帝大怒謫福建按察司

知事移疾歸廷臣屢薦將召用而京師陷福王立召起故官不赴明年五月南都不守江西郡縣多失同升攜家將入福建止雩都與楊廷麟謀興復唐王加同升祭酒同升乃入贛州偕廷麟籌兵食取吉安臨江加詹事兼兵部左侍郎同升已羸疾日與士大夫講忠孝大節聞者咸奮以廷麟請撫南贛十二月卒於贛州

唐文獻字元徵華亭人萬厯十四年進士第一授修撰歷詹事沈一貫以妖書事傾向書郭正域持之急文獻偕其僚楊道賓周如砥陶望齡往見一貫曰郭公將不免人謂公實有意殺之一貫跼蹐酹地若爲誓者文獻曰亦知公無意殺之也第臺省承風下石而公不早訖此獄何辭以謝天下一貫斂容謝之望齡見朱廣不爲救亦正色責以大義願棄官與正域同死獄得稍解然文獻等以是失政府意久之拜禮部右侍郎掌翰林院事初文獻出趙用賢門以名節相矜許同年生給事中李泂劾張鯨被廷杖文獻掖之出資給其湯藥荊州推官華珏忤稅監逮下詔獄文獻力周旋得無死掌翰林日當考察執政欲庇一人執不許卒官贈禮部尙書諡文恪楊道賓字惟彥晉江人萬厯十四年進士第二授編修累遷國子祭酒少詹事禮部右侍郎掌翰林院事轉左改掌部事嘗因星變請釋逮繫知縣滿朝薦等又請亟舉朝請大典皆不報南京大水疏陳時政略言宮中夜分方寢日旰未起致萬幾怠曠請夙興夜寐以圖治功時